



Perorsaanermi, isumaginninnermilu suliatigut piginnaasat meeqqat atuarfiani atualertunut atorluarluarnissaannut qanoq pitsaanerulersinnaanersugut pillugu, apeqquteqaat aallaavigalugu oqallinnissamik siunnersuut

(Inatsisartunut ilaasortaq Pipaluk Olsen, Demokraatit)

Demokraatit Inatsisartunut ilaasortaatitaata Pipaluk Olsenip pitsaasumik, takorluuisumillu oqallissaarutaanut qujanaq.

Atualerneq inuup inuunerani piffissani aalajangiinerpaat ilagaat. Tassani tunngavik pilersinneqartarpoq, atuagarsornerinnaangitsukkut aamma inuttut. Tassani ulluinnaat nutaanik piumasagaatillit, atassuteqaatillit, naatsorsuuteqartullu meeqqat siullermeertumik iserfigisarpaat, ikaarsaarnerlu tamanna ilaannut toqqissisimanarlunilu nalinginnaaginnartoq ilaannut nalorninermik, misigissutsikkullu annertuumik unammillernartutut migineqartarluni. Tamannarpiaq patsisaalluni atualerneq qanoq toqqissisimanarnerulersissinnaaneripput, ataqatigiinnerulersissinnaaneripput, ineriartuutaanerulersissinnaanerippullu pillugu siunnersuutip matumap ukkataqalersitsinissaa eqqorlunilu pingaaruteqarpoq.

Siunnersuuteqarnermi eqqarsaatit, siunnerfigineqartorlu Demokraatit tungaanniit nersualaarussuppagut. Qitiulluinnartoq oqaasertalerneqarpoq, tassalu ilikkagaqarniarneq kisimi aalajangiisuunngitsoq. Meeqqat atugarissaarnerat, atassuteqaataat, takuneqartutullu aamma paasineqartutut misigisimanerat ilikkagaqarnissamnut ilassutaaginnaratik, ilikkagaqarsinnaanermut tunngaviupput. Meeraq toqqissisimasutut misigisimagaangami ilikkagaqarnissaminut sapiunneq ajorpoq, meerarlu takuneqarlunilu tusaaneqaraangami peqatigiinnermut eqeersimaartumik peqataanissaminut kajumissuseqarnera, piumasuteqarneralu annertusisarlutik.

Ilutigisaanik unammillernartumik inuiaqatigiittut iliuuseqarfigissallugu pikkoriffigisimanngisatsinnik siunnersuut tikkuavaoq. Piginnaasat pigeriikkagut naammattumik atorluangilagut. Meeqqat atugarissaarnerinik, atassuteqarnerinik, ineriartornerinillu suliaqarnissaminnut ilinniarsimasunik pikkorissunik, atualernermilu ukiumi siullermi pingaaruteqarluinnartunik piginnaasaqartunik perorsaasoqarlutalu isumaginninnerup iluani sulisoqarpugut. Taamaakkaluartoq atualernermi taakkua piffissap ingerlanerani takussaajunnaaleraluttuinnarsimapput, tamannalu taamaassanersoq maanna immitsinnut aperissalluta pingaaruteqarlunilu isumaqarluarpoq.

Meeqqat atuarfiani piffissami ilinniartitsisussaaleqiffiusumi, ilinniartitsisut sulerulunnerini, killilimmillu isumalluuteqarnerini aatsaat iluamik pingaaruteqarnerulerpoq. Taamatut inissisimaffimmi allatut, tamaallu isiginninnerusumik eqqarsassalluni isumaqarluarpoq. Siunnersuut ilinniartitsisunik taarsiinissaminik



siunertaqanngilaq, piginnaasalli amerlanerusut atulernerisigut meeqqamik sullissinneq nukittorsarniarneqarluni. Tamanna piviusumik inissisimanitsinnik, isumalluutinillu pigeriikkatsinnik aallaaveqarmat, tamanna Demokraatinit akisussaassuseqartutut, siumullu isigisutut isigaarput.

Meeqqat atuarfianik meeqqamik tamarmik inissaqartitsisumik pilersitsinissaq tunngaviusumik pineqarpoq. Atuarfik ilikkagassatigut anguniagaannarnik ukkataqanngitsoq, kisiannili aamma atugarissaarnermik, toqqissisimanermik, ataatsimooqataasinnaassuseqarnermillu ukkataqartoq. Tamannami iluatsikkutsigu meeqqap atualernerani ukioq siulleg kisiat nukittorsaannarnatigu, siunissami atuarnissaa tamaat aamma kingusinnerusumi inuunermi periarfissai nukittorsassavagut. Inunnut aningaasaliineruvoq, aningaasaliineruvorlu akilersinnaavoq.

Tamanna pillugu siunnersuummi apeqqutigineqartut pimoorutissallugit pingaaruteqarpoq. Isumalluutigut atorfissaannut ullumikkut atorpagut, atualerneq pitsaanerpaamik aaqqissuussimavarput, meeqqallu tamarmik toqqissisimasumik atualernissaat qulakkeerniarlugu naammattumik iliuuseqarpugut? Apeqqutit taakkua imaaliallaannaq akisassaangillat, kisiannili pitsanngorsaaniisaq ilumut kissaatigigutsigu apeqqutit taakkua apeqqutigisariaqarlutigit.

Taakku ammasumik, tunngavilersukkamillu oqallisigineqarnissaannut apeqquteqaat aallaavigalugu oqallisissiaq manna pingaarutilimmik periarfissiisutut Demokraatinit isigaarput. Meerartagut pitsaanerpaamik aallaveqartariaqarput, akisussaaffillu taanna tigussavarput.

Oqallilluarnissarput qilanaaraarput.